

鈕璫作觚觶流傳甚廣

興臨野堂集却不多

見首有汪啟淑藏印

大雨中得之來舊

閣 五五二年

西語

臨野堂集序



予方弱冠結交皆老蒼時諸公
論詩競斥鍾譚左袒中原七子
七子主聲調似近盛唐然滄漠
謂唐無五言古詩而先正所云
效法於唐固指古體至律絕歷

唐始備奚假更端天之賦才非
嗇於今而豐於古江河日下視
古人不啻逕庭豈獨其才疎哉
學之不逮久矣讀書破萬卷下
筆如有神往惟吳郡顧亭林徵
君不愧斯語徵君古文縱橫左

史詩獨愛盛唐嘗言詩有景有
情寫景難抒情易含難而趨易
趨向一乖去之逾遠徵君不可
作盱衡當代賢豪好學深思心
知其故不少概見近乃得粟邑
鈕明府玉樵先生起徵君同郡

而春秋鼎盛剖符西土敝廬託
在比鄰偶抱沉痾猶稽上謁去
年冬杪冰雪滿途明府惠然肯
來相與燒燈連榻高談竟夜竊
謂學詩有三候從事既久已以
爲佳人亦以爲佳顧置之唐人

集中未類則姑舍之而益孜孜
焉久而已以爲唐人亦以爲唐
顧置之盛唐集中未類則仍舍
之而益孜孜久而已以爲盛唐
人亦以爲盛唐顧其聲調是矣
而矩矱不無參差又進而加詳

焉所云效法于唐擬議日新之
功漸濡旣深而後水乳融洽明
府聞之潛會所適謂可與言詩
也盡傾宿著若干卷屬以較讐
遂舉生平所學於漢魏六朝盛
唐者審其離合蕩滌議論崇雅

黜浮要於沈實極於蘊藉必盡
當而後入選旣卒業因嘆明府
高才晚達績學得之過庭悱惻
纏綿根本至性公車落落久旅
京師至假館三韓大家僕從皆
星散初宰古項拊厥荒殘報最

序
四
方新而旋羅艱以去苦塊屏跡
岷岵迭違其中歲月之遷流人
情之數易或啼或笑堪喜堪愕
之故一切發諸詠歌衷緒紛來
若環遞引感激而彌永窮愁而
後工蓋明府寢處古人深造自

得所云取材於選效法於唐萃
其骨而食其神切劇殆無遺憾
頃座次矜言三候公厭沃且過
之矣古文諸體森然而儷語尤
爲絕構風華逮兩晉典贍包三
唐地負海涵欽爲觀止書疏真

序
氣透紙樂府逸韻動襟悉蘇黃
雋品姜史清音也雜記義該懲
勸足以單行恨予病腕呻吟未
遑細加評註僅丹鉛詩集呼兒
供紙筆隱几臨軒楹附名簡端
而予其屋畧如此

皆

康熙二十有九年日南至鄰治
年家弟中南山人李因篤子
德甫頓首拜撰



居項胥鈔題辭

余與鈕子玉樵別十餘年矣平時服其驚才絕艷
方駕齊梁西崑以下俱所不道頃謁補來京師爲
僕述其作令項子時事酒酣以往肯背誦其詩數
十首皆婉麗悲激長於諷諭絕不類其少作中如
和杜秋雨歎憫時穡不登泣柳詞四章刺治河無
術草木告灾凡此類皆有關係亂足備詩史者昔
子美愛元道州春陵行兼賊退後示官吏作而和
之且曰安得結輩十數公落落然叅錯天下爲邦
伯萬物吐氣天下少安可待僕於鈕子詩亦如是

是齋
矣然元詩評直至詆銜命使者為不如賊於所謂
比典體制猶未盡合故一讀可了其意以鈕子之
寓託深遠使不善觀之直與近世詞人吟咏性情
嘲玩風月者何以異僕故為之疏明其大意使知
鈕子之為吏良寧謚不苛去而見思其設施具有
原本如此傳所謂溫厚和平者也讀者亦當以此
得之康熙二十七年戊辰二月日慈谿弟姜宸英
誌



臨野堂詩集

總目

卷一

笠釣初吟

卷二

笠釣再吟

卷三

笠釣三吟

卷四

前筑音

卷五

後筑音

卷六

居項胥鈔上

卷七

居項胥鈔下

卷八

端暇遊

卷九

續筑音

卷十

栗語

卷十一

南縣客筆

卷十二

柳下言

卷十三

荔夢編

臨野堂詩集卷一

吳江鈕

琇玉樵著

笠釣初吟

咏史

平居傷側陋弱冠游京師獻策金馬門陪輦昆明
 池金張若比肩許史同追隨城南賜甲第繡栱珠
 采愚綺袖充下陳華軒交中逵側聞羽檄至候騎
 日夜馳擐甲拜明詔指揮收燕支紫塞奏捷獲丹
 山樹豐碑雄名載麟閣元績紀鼎彝頗酬夙昔志
 俱羨遇合奇富貴會有盡卷舒須及時敝屣棄妻

子言歸南山陞

灼灼原上花紛紛從風度本無歲寒心安得金石
固梁侯據要津烜赫被隆遇賓客皆縞珠恩波及
親故居高道履危况乃權黨附兼此跋扈才速其
自亾具多斂建禍樞積威啟仇妒戈矛瞰爾室猶
以酖毒悞九錫未辭榮五侯已當路還睹如市門
茫茫但墟墓千載空遺悲足令達者悟

勢盛疎族聚時危密交輕忠孝良所難安能念友
聲左駮贖胥靡越石肝膽傾虞卿窮來歸相位不
足榮艱難存故孤慷慨有程嬰俠哉魯孔褒捐脰

殉俊英此誼昔有之簡編光崢嶸今人棄如遺勢
利兩縱橫窮達意已異何當論死生俯仰愧往哲
緬言感余情

抗旌出都門簫鼓發皇州綺帶腰寶印玉驄駕華
輶從官盡錦衣廝養皆兜鍪公卿盛祖帳劍舄一
何適功成歸故鄉賜爵淮陰侯馳驅向舊里感慨
懷昔遊河干一飯恩遂以千金酬當時兩年少蒲
伏行道周末至萬戶貴寧忘勝下羞困厄激壯志
憂傷成良猷氣凌漢天子蹉跎何足仇

陳竇履禍始衆賢蒙殊殃就徵來北市纍纍服桁

楊親朋不敢顧愴惻投園牆長視萬古途不恤一
死償家孥屬吏去流離走遐荒非無曠世才年命
等朝霜夙好在詩書豈知溝壑藏報賢以質樸殉
國名益彰殞身得其所懷古增感傷

題周氏郊外園亭十二韻

勝地偏依郭幽居獨背城春光芳逕合草色暖雲
輕密樹重門暗斜陽曲檻明吠花籬隔犬啼柳岸
藏鶯繡壁蒼苔古穿池碧水平松風搖鶴夢竹靄
散茶聲客泛林間酒仙畱石上枰虹橋漁繫艇江
月院吹笙白袷銀紈扇朱盤錦帶羹烟霞忘歲月

泉石憶簪纓習靜時聞梵栖閑未輟耕長吟堪避
世高卧有餘情

月夜

瑟瑟西風裏危樓四望明砌蛩吟月色籬犬吠秋
聲雲薄千山爽烟空萬木平遙憐榆塞上遷客更
關情

吳山

古閣臨斜澗危簷出茂林雨生芳草態春老落花
心村逕高還下山泉淺復深晚來乘月上倚杖一
微吟

靈巖

香徑闕雲外琴臺片石中一亭啣夕照萬壑動秋
風成敗英雄盡興亡歌舞空年年芳草地人識舊
吳宮

穹窿山下夜泊

亂峰圍獨夜旅棹枕穹窿柳樹村家月梅花野寺
風僧歸山色裏客夢水聲中雲外疎鐘落天高河
漢空

支硎山逕

欹側尋山逕綠崖試短筇斷雲開絕壁落日轉危

峰澗引春田水林藏午寺鐘遊人歸未得草色已
茸茸

虎阜春遊

山橋芳樹雨初收斜日鶯啼杜若洲珠勒馬嘶花
滿院紅衫人倚柳藏樓春塘舞燕風如剪夜閣調
笙月似鈎酒館畫欄歌吹罷王孫扶醉下扁舟

秋夜憶雲奏弟

庭外棲烏繞樹鳴西風拂拂亂雲輕一窓榻鎖梧
桐影四壁燈連蟋蟀聲楓葉醉餘霜自落桂花香
盡月還明懸知鷺水流難極偏爲離人動遠情

初冬自書館至家往還道中卽景

楓林夾路亂紅稀側側輕寒耐薄衣黃葉半庭秋
自忖白雲一棹客初歸烟生橘柚連殘雨風滿蒹
葭動落暉慣是多情溪水雁數聲還傍短帆飛

戴耘野先生冬日枉過草堂出示紀事諸書

賦贈

朔風起重陰凜冽歲云暮平疇交荒烟流旭照衰
樹居人啟寒扉有客忽我顧言念十載別抒懷慰
永慕父語忘寒暄乍見失新故俯仰道夙昔感歎
驚良晤促席濁醪陳傾厨鷄黍具座貽書一編伏

讀見平素大義著草莽微言託韋布惜哉柱下才
乃失班馬遇業盛禍已集名卑身益固所圖非世
資終晦亦何懼戢鱗樂淵沈鍛羽悲霄翥何如擬
玄豹終隱南山霧

題綠寰庵八首

曲岸層陰地縱橫一畝宮藥欄畱鶴子書帙授猿
公暝樹浮烟合晴湖落照空淒涼吳楚事何處問
羣雄

地僻忘暄暘依鄰纔數家綠分穿港水紅露隔牆
花霧氣沈寒日山容媚晚霞欲尋蘭若路疎竹幾

枝斜

茅茨村徑細古刹隱迴塘菰熟漂新米蓮枯冷舊
房虛無傳白法奢侈禮空王遙憶談玄座跏趺納
晚涼

一自成蓮社秋來月幾圓青燈孤榻夜白髮老僧
禪石鼎禽啣飯蕉雲鹿覆眠逢迎知獨少形迹近
嘗捐

日夕禪扉掩寧知世有秦得閑因減病知足遂忘
貧水漾菱絲弱霜含菊蕊新故人陶與陸移席醉
芳辰

薜荔垂庭曲莓苔繞砌陰澗泉因煮石點筆每披
襟老樹階前臘疎鐘世外心曉來新雨過虛牖白
雲深

空林寒磬晚淨水定微波夜靜聞秋蚤人閒見月
多蘆花明雁路楓葉冷漁歌借問庭前石玄言悟
幾何

斷浦斜陽外蒹葭水一灣竹風吹藥竈花露滴松
關沙淺迴平岸林疎出遠山杖藜時得句吟苦未
知還

月下海棠歌

春日迎溫風荏苒池塘小院斜陽斂絲絲暖雨近
清明紅生芳樹輕干染玉漏沉沉夜戶開水晶簾
捲月初來明妝不待燃銀燭艷舞還疑入鏡臺數
枝凌亂光浮動數朶輕盈疎影弄黃鶯聲裏夜爲
年白玉堂前春似夢憶昔開元全盛時深宮疏綺
閉蛾眉珠樓香燼寒生早金屋人慵卧起遲無限
繁華同轉轂淒涼錦襪遺空谷凭闌無復女如花
回首馬嵬芳草綠東風把酒酌花神且須盡醉海
棠春君不見年年繡嶺宮前月曾照當時睡足人

楊柳篇

三月春深花滿谿江頭楊柳絲初齊掩映風光千
萬里垂絲牽惹亂鶯啼橫塘碧水蘭舟泊香車遊
女羅衫薄細雨青帘賣酒鑪斜陽朱戶鳴箏閣漢
宮日暖正高眠隋家堤畔色如烟綺樹柔聲巢翡
翠芳園疎影落鞦韆鞦韆庭院花無數勾欄曲檻
飄金縷翠眉淡掃鏡中妝纖腰學試簾前舞舞簾
妝鏡謝鉛華古驛蕪城噪晚鴉雲迷錦帳將軍壘
霧鎖柴門處士家年年遊衍在關河白苧笠篔起
暮歌梁苑文人遊思倦章臺怨妾淚痕多夢太章
臺情已隔灞橋送遠愁應積依依長向別離人行

行盡是風塵客五陵年少紫騮肥珊瑚裝劍紅錦
衣青樓正在深深處醉倒金尊夜不歸

春草詩十二首

年年新綠到柴扉偏是王孫未得歸明月清溪鷗
獨夢疎簾微雨燕雙飛春生灞岸催遊屐人去巖
陵剩釣磯鶉鳩縱令鳴太蚤故園應更惜芳菲
不信繁華事已空傷心南浦復濛濛何年陵寢斜
陽外幾處亭臺暮靄中歷亂影連流水碧萋迷香
襯落花紅多情陌上雙蝴蝶猶是飛飛識故叢
春愁忽忽遍天涯青滿谿頭憶若耶寂寂蓬窓楊

子宅離離苔徑蔣生家東風猶記縈書帶南陌還
看走鈿車連袂踏歌多勝事莫令惆悵閱年華
無限薰風散玉河是花能舞鳥能歌參差雨長芳
洲滿遠近烟生廢苑多秦塚暮愁埋石馬漢宮春
思泣銅駝誰憐一片平蕪地曾有鞦韆翠輦過
又見盈堤黛色浮亂英飛絮共悠悠雲歸古寺藏
殘碣雨暗平原失戍樓折柳曉嘶遊子騎採香春
泛麗人舟彌生一叅無消息腸斷當年鸚鵡洲
處處芊眠度畫輪相逢極目可憐春深閨垂帶宜
爲佩野客攜尊藉作茵舊恨祇餘歌舞地新愁又

起別離人武陵遮斷漁舟路無復桃源可問津
嫩寒無力綰游絲正是沅湘飲恨時小院迴廊蟲
跡遍高江遠浦雁聲遲葛翁仙去沉丹井陶令官
閒補菊籬應識捲簾凝望處蒼茫遠道正相思
二月東城聽早鶯踏青強半賣花聲河橋水淺鳧
羣浴村塢風清犢子鳴玉女虛窓蒼蘚合將軍故
第曲池平幾回野老吞聲哭愁見江頭日日生
一度登臨一惘然青蔥又值艷陽天頻經戎馬疎
還客行盡關山斷復連戰壘淒涼家萬里鄉書迢
遞客二年年來未能遼陽戍最是荒蕪谷口田

常恐憂多學種萱歲稊輦路憶君恩日遲風落櫻
桃子春暖香棲蛺蝶魂傍檻晴莎連舊苑盈堦夜
露鎖重門尋芳士女歸來晚指點前溪印屐痕
憑將心賞屬東皇攜杖閒行古道旁似解有情偏
獨媚最憐無地不同芳頻催思婦飄蓬鬢好待山
家製荔裳薄暮孤村歸牧豎橫吹一笛下牛羊
一望春光入杳冥無端幽意在林垌重來孤館依
然綠看到荒郊不斷青惹恨欲迷來往路迎人偏
繫短長亭惠連此日多新句獨向池塘夢未醒

同周安節郊外晚眺

寒日下孤城風飄畫角聲人家千樹暝水寺一燈
明野艇衝烟渡春犁帶月耕嗷嗷聞旅雁中澤有
哀鳴

題方石居贈忍公用吳愧庵先生韻

方庭修竹綠如圍琴榻書床識靜機紫朮夜春供
客飯白雲秋製入山衣落花徑曲呼童掃斜日林
空放鶴歸最喜遠公寬酒戒虎谿乘月叩禪扉

九日登畢西臨招爽閣却憶去年讌集感而

有作

登臨共訝隔年華畫閣風清醉盃嘉黃菊再逢羈

客酒白衣重到故人家半窓秋聽孤燈雨幾處楓
驚二月花回首舊遊同作賦依然短褐滯天涯

秋日病寓江城豐翠園

綠陰孤閣晚來登極目風烟望幾層萬堞暮雲寒
戍鼓一江秋雨暗漁燈思歸菊已荒彭澤病渴人
還卧茂陵欲向君平詢出處浮沈身世總難憑

夜坐寶稼堂

碧甃桐陰合金風散夕涼月來秋覺好病起夜知
長蟲語喧花逕溪聲撼草堂漸看搖落後林葉滿
方塘

贈顧英白

芳蘭萎幽谷稊稗敷良田魚目重連城國寶沈長
川貴賤夫豈殊所居乃使然三吳遊冶子裘馬何
翩翩多金起高譽盛勢由奧援賓從自赫奕冠蓋
相鉤連綠蕪春挾彈朱閣夜鳴絃聲燄忽已盡榮
華遂終湮獨有蓬室士潔修在香荃脫屣謝軒冕
披襟遊林泉誦讀欣有得疑義窮所研上採孔壁
簡下探禹穴編風騷追正始曆象渺太玄唯知樂
鉛槧豈復畏迤邐市朝固有營服道亦不閤冥靈
與夕菌小大各異年顧念肉食者邈焉若浮烟窮

愁安著書名譽久逾宣

丹青歌贈陳浮霞

漢皇逐楚鹿下詔營新豐新豐之市宮室巷陌何
縱橫布置悉與微時同鷄犬各自還其家兒童識
途忘西東陳生丹青得其意造筆往往侔天工吁
嘻乎陳生以爾磊砢卓犖之奇才身如謫仙人行
從蓬島來三十四學畫能成名十五十六短衣
蹙蹙走塵埃有時注目神構成造物失色溟濛開
古來畫師非一手揮毫落紙凌羣材或爲韓幹馬
龍駒渥洼從天下或爲與可竹篔簹千尋倚空谷

或爲李臨川白描竿並肩或爲趙松雪山水尤稱
絕我吳石田差足數誰其儕者唐伯虎時危道衰
已百年爾復薄遊來人間人問拙目安用此悶來
花鳥恣盤桓明月青帘醉酒肆疎鐘殘燭卧禪關
長嘯不肯入朱戶雲白山青自往還吁嘻乎陳生
安得坐爾縵城仙山萬仞之高樓琉璃碧檻珠恩
浮上客如雲賦麗詞鳳簫龍管揚清謳嬋娟二八
侍玉硯玄霜墨妙盈銀甌膠東錦笺起石壁鴛溪
冰綃生滄洲爲我寫作河山大地俱入桃源遊不
知秦漢晉魏春與秋古今公來一漁舟落花流水

兩悠悠

春晚徐嵩芝過訪村居

深巷飛花急幽人躡屐過世名貧後減交態客中
多斷靄開晴樹空烟起夕波江干春尚好歸去理
漁簑

村遊漫興同英白

春霽開斜照扁舟遡晚風絮飛粘水白花發映園
紅桑柘通村逕壺觴就野翁醉歸臨夜戶犬吠月
明中

寄答沈竹西

東風春暖桃花飛春湖流水鱖魚肥斜陽繡陌熏
芳草游絲輕颺牽人衣前溪歌舞恣歡謔書舫香
車猶未歸忽然動地黃塵起萑苻盜發茗東水紅
巾刺船搖大旂紛紜蔽野來蒼兕鄰比十室九室
空經時不敢歸鄉里時余獨向南湖行知君攜家
走江城城邊客館臨江渚迴廊曲檻連高甍池塘
雲滿題春草楊柳風多聽晚鶯飄搖羈旅江關暮
懸知落魄猶如故卓犖文章尚布衣縱橫豪治皆
統袴終生總有棄襦才數竒已爲儒冠誤男兒坎
壈誠可憐况逢喪亂尤顛連遂令夙昔同遊者落

落參商各一天迢迢相望百餘里山青雲白心茫
然雲山極目空離思故人幸有雙魚至夜雨燈殘
夢獨勞滄江天遠書還寄宛轉書中問離索錦囊
復緘神仙字回首春風陌上遊于今梧葉已生秋
玉沼芙蓉垂白露銀河鴻雁響朱樓風塵幾下徐
陳榻離亂誰同李郭舟鷓鴣之裘蒲萄酒明珠爲
文玉爲友草堂何日賦歸來與君雪涕重攜手

湖村田家

毒雨積籬落輕風飄疎花隴麥尚未熟田芋方初
芽昨日甫浴繭新絲下纜車老翁入村市貨鬻不

還家簿吏已在門怒色言語譁乞鄰具雞黍猶懼
譴責加黽勉求吏去荷鋤歸東畝夕釜無米炊室
中空咨嗟

山郭田家

南風吹葛覃藹藹被繁綠御暑無完裳腰鎌向中
谷去年乏冬儲行貸錢與穀五日一責逋豪家多
威僕刈獲猶未成織紵他人服大兒裸半體少女
空倚軸豈謂入朱門閑居厭紈縠

贈慧上人

浮土逐妄迹來逝何紛然靜者得其理慮澄外物

捐弱齡釋塵鞅抱道乃彌堅幽姿發雄才慧業成
穎年焚香石室內散帙歷羣編曠懷渺萬古始悟
皆蹄筌聞見了無繫齋居得自便清池澹微波孤
月流中天持此證禪心清宵常無眠跣趺南窓坐
落花盈庭前

晚晴野眺

霽色初開夕照斜望中青藹徧桑麻前邨市小藏
深樹隔浦帆迴帶落霞風軟綠莎飛燕子雲陰朱
閣捲楊花柴門有客攜筇立閑看烟林噪晚鴉
百花庵病卧喜朱不遠先生見過

爲客偏多病淒然卧梵宮雨聲秋磬裏蟲語夜燈
中藥沸慵添水衣單怯受風故人能數過猶喜慰
途窮

感事

赭服南冠兩髻華却攜妻子繫天涯春風客淚河
橋柳夜月鄉心驛路笳慟哭范滂猶有母飄零張
儉已無家只今知己多豪俠空憶當時廣柳車

弼教坊

絕命悲辭獄裏成啣鬚赴市氣崢嶸曾無富貴娛
楊惲偏有文章殺繡衡白骨幾人收遠瘞青編何

日署空名只應日夜錢塘水怒作寒濤千載聲

咏蘭贈閔若上人

自入幽人谷偏懷王者香根從滋九畹叢早發三
湘玉樹枝相亞金盃筍漸長秋風來遠道春草近
閔房無復當門忌真堪遶室藏靜知馨獨永暖得
韻初揚尾坵分苞綠心踈浥露黃養應供綺石紉
足佩荷裳清夢迷蝴蝶幽操引鳳凰化茅懲末路
依竹喜同芳共識咀爲咏寧知握是郎倚倚終莫
採道味足相忘

秋日村居雜感

孤村水繞舍西東
槭槭寒林起朔風
花冒雨開新徑
菊葉隨霜落故園
楓鳧飛蓮渚
秋雲白犬吠柴門
夕照紅尊酒未逢
陶處士巾車蠟屐幾人同
暮蟬涼雨過汀洲
衰草荒雲滿目愁
薜荔逕通沽酒市
芰荷潭繫釣魚舟
田蕪猶喜還收秫
貂敝堪憐獨攬裘
牢落空餘王粲志
愧無衫筆賦登樓
大火西流玉露飛
貧家九月未成衣
茅茨夜響鄰翁杵
蟋蟀寒催織女機
問世更無文可賣
論交惟有劍相依
芙蓉落盡秋江上
欲採何從頗已違
清泉碧石坐徘徊
風急天空木葉催
久客莫歸鱸

正美遠書誰寄雁
初來高原潦盡芟
種稻廢苑烟深閉
草萊塞北只今多
戍客不知幾上望
鄉臺屋破經時更
結茅微霜忽見滿
林梢溪深秋暗魚
龍窟風勁寒凌鶴
鶴巢別墅自耕三
畝宅舊遊空說八
厨交南垞寂寞西
園冷不俟雲亭著
解嘲憔悴行歌傍
水濱蕭然野服稱
悶身蘆花江上悲
窮士桂樹山中憶
故人岸草成叢蟲跡徧
床書散帙鳥窺頻
忘機自擬玄真子
欲與沙鷗作比鄰
秋晚過長慶寺喜
晤醒石上人

雲澹日將夕
農人歸暮田
悲風颯以至
落木凌秋

烟散步入古寺昏鐘錚絃傳窅然曲房深石岸環
流泉醒公讀書處乃在西堂偏入定月生席翻經
鳥窺筵還餘昭曠懷習靜窮陳編孤館喜我至鼎
茗手自煎冲夷見道貌洋纒皆玄詮坐令鄙吝忘
恍若釋纏纏明日揮手去塵情恐復然

溪上曉發

疎星數點映春堤畫舸乘風發曉溪兩岸霧開微
見樹孤村月落遠聞鷄烟中行客歌相答水上人
家望欲迷自汎浮生遊已倦爭如林鳥尚安棲

春盡憶故人有感

去年猶記談經處今日誰爲載酒過江鴈乘春歸
獨早林花冒雨落偏多三君意氣應常在二俊文
章竟若何爲憶故山樓隱地頽門深自鎖烟蘿

臨野堂詩集卷二

吳江鈕 琇玉樵著

笠釣再吟

望亭曉發遇雨

曉發望亭下揚舫石塘畔榜人帶星語客子臨水
盪月落荒鷄鳴霧息林鴉散有滄自東來山雲漸
瀾漫激浪駕修圻狂飈吼叢灌孤舟渺一葉漂泊
中流半帆席忽傾欹窗蓬驟凌亂風定雨力微倚
灘具晨爨須臾霽色開恍若天始旦乃悟向所歷
轉眼一何幻顯晦理相尋陰晴境同觀利涉固有

時危瀾亦屢見苟非杜門居寧免颺搖患人生貴
適意何用浮名絆慷慨遊子懷載途起長歎

無錫郊外

沿河艤行舟背郭展清曠綠樹藏酒家青山對書
屋花溪吠獨龙麥隴歸羣犢疑入武陵源欲從漁
子宿

青陽道中

叢竹連修坂垂楊蔭大堤江湖痕上下水市路東
西岸穴衝泥蟹林飛啄麥鷄曩年疏鑿事回首夕
陽低

登君山

一片孤峰枕碧流登臨復上最高樓潮聲曉落魚
龍伏山氣晴開日月浮遠浦亭臺疑蜃市平沙島
嶼見螺舟憑風幾欲乘青翰破浪還爲萬里遊

賦得陽鳥十五韻送潘次耕就婚淮上

水國南征雁乘春向北遊翺翔雙翮勁嘹唳一聲
幽備德齊丹鳳盟心狎素鷗江湖多旅跡關塞動
離愁彭蠡蒼葭變衡陽碧草稠屢成天外字忽報
月中秋繫帛傳情遠銜蘆慮患周已無羅網禍寧
有稻梁謀聯翼偏知序和鳴似好逑彩書投綺閣

玉柱奏芳樓求友冰初泮來賓露正流豈期鴛鴦夢
穩還效鶴儀修漸陸誰同志隨陽未寡儔冥冥沙
樹迴渺渺塞雲浮四海皆安宅天涯自可留

懷沈竹西

苦憶休文裔風流舊有聲葉題秋寺徧螢聚夜窓
明白鳳才誰並青羶業已成幾時杯重把爲悉別
來情

海棠

種亦來仙苑何須發向春風清飄綺薄露密染脂
勻細語蛩相得深栖蝶自親西窓明月夜應有斷

腸人

玉簪

葉葉新筒展枝枝弱縷垂好如銀管直未與翠鬟
欹乍脫依寒砌徐抽向晚籬最宜纖手折香滿鏡
臺時

寄仲岷山

獨憐春盡掩荆扉長日如年勝事稀花信無多蜂
館靜柳陰纔密燕兒肥晝閱最惜青鏤管風暖初
宜白苧衣久欲尋君湖上宅詩筒遊屐幾相違
春日雪後重過端清堂觀盆梅

積素融廣庭輝輝度遲日芳梅振寒蕤幽芬已洋溢况乃沐陽和含姿遂爭茁故柯起復垂新蕊疎亦密紛披有殊態連蜷光滿室本以尋丈材茲焉受徽繻譬之螻蟠泥自具蛟龍質但恐乘白雲玉鱗忽超軼所願珍孤標勿與凡卉匹森然歷冬春永伴孤山逸

曉經梅堰同顧英白賦

征棹侵霜發荒荒天未明樹銜初落月鐘報欲殘更野店懸燈影村扉出犬聲曉途知尚遠憑藉一帆輕

初夏田家卽事

疎槐高柳隱茅茨入夏田家事事宜
繭蛹漿寒黃作膾穀芽粉膩白成糝挈瓶自擬忘機叟帶索誰貽誚
熟詩唯待前林新月上晚涼攜酒聽鳴鷗
百花飛盡綠陰多鳩喚新晴水湧波
玉版乍添籬迸筍金錢初泛沼舒荷榻欹元亮風前枕門挂玄真雨後簑
何事名山求息影是鄉應已勝巖阿

五日遊萬壽尼庵四絕句

清梵聲傳寶樹陰曲廊路轉紺宮深
女僧合隊修禳罷角黍分齋色勝金

芳容如雪帔如鴉疑是諸天玉女家若使當時畱
寶鬢今朝滿戴石榴花
掌合蓮花問訊遲微呈皓腕素珠垂可知命薄還
須續纏臂應添五色絲
花絨募得自針孃八角纏成貼繡牀聞說靈符能
鎮膽夜眠今不怯空房

冬日村居卽事

築圃功初畢農閒十月交禾登聞雀語木落見烏
巢香甌旋炊秫霜廬自結茅不愁衣褐少春已在
梅梢

咏匏杯贈王餘不山人

味苦材無棄工良力每深輪囷存素質追琢見虛
心未得明堂薦寧辭陋巷斟持將流曲水堪與易
千金

答竹西玉舟喜余授徒于家之作

浪跡多年返故廬自慚素業尚傭書貧無聲伎簾
嘗撤懶任吟窗草不除月冷夜攜三雅爵花深春
伴五經鋤同心只有羊求在來往蓬門幸未疎

庭前二友歌

三春花事紛如織上巳纔過復寒食東君無計繫

春歸撻拾繁華成國色纖雨和風拂面來海棠信
遠牡丹開夜燈睡向銀缸見曉露香從錦幕回手
把花枝揖花坐呼汝二友心徘徊汝亦富貴客冉
冉韶光流綺席汝亦神仙姿珊珊弱體生瑤池何
爲徙倚蓬門與茅屋偏向吾廬伴幽獨吁嘻乎謫
仙一醉不復醒人間豈有沉香亭寂寞黃州夢已
闌雪堂遺構久摧殘世路羊腸那可止交態浮雲
竟誰是年年相與對春風眼前知己唯看汝

春日貸錢友人造門不獲前歸舟泊能仁寺
訪閤石上人見近詩留此誌感

東風失意在扁舟遙指珠林訪舊遊數樹夕陽歸
古渡一帆春影落芳洲饑能驅我同元亮語欲驚
人得貫休此日窮途無限淚憑君灑向虎谿流

舟次唐棲

千尺飛梁夕照間石塘春水縠紋斑輕紅霞散林
中寺遠翠雲圍閣外山夾岸民廛殊井邑通宵賈
舶下江關不知何事南來客冉冉征途亦未閒

夏夜能仁寺禪房

盛暑不得暮坐躡古佛閣所待生金波浣此火雲
薄復有素心人來共松下酌一尊已頽然更深寢

方覺攬衣步前軒皎月升林角時聞疎竹風聞與
蟲聲作遙遙何處村人夢滿墟落惜彼清夜徂獨
醒視寥廓

初夏綠陰和沈竹西

紅雨吹方盡青陽序已周晝長風掩冉寒定日夷
猶乍覺池塘滿旋看院宇稠榆烟高冪冪柳浪遠
浮浮兔日城槐合龍孫塢竹抽梢雲嘗隱岸映水
忽成洲獨占鄰牆角渾忘野渡頭密仍通翠陌深
不露朱樓穿燕飛能巧藏鶯語自柔晚吟縈客騎
晨夢覆漁舟蠶婦攜筐入耕人負耒休沙依羣聚

鴨隴掩獨歸牛肅穆虛巖淨紛披古道悠共攀論
昔別重到感前遊拂座痕如染沾衣色欲流漢南
宐點筆渭北任凝眸杜牧佳期阻王恭勝槩畱微
薰三徑落繁蔭一簾收莫更迷仙子還應待故侯
終朝箕踞坐好與伴清幽

哭顧英白

絕學如君亦數奇忽逢奄逝更堪悲千秋風雅曾
刪正一代文章獨起衰禹穴探書遊跡遠夔門縱
酒歲華遞生平無限名山業欲待傳人信是誰
金澤西偏龐水東蕭然環堵見遺宮南陽事業韋

編裏北海才情蒯劍中月落楓林新夢杳雨昏苔
壁舊題空故園梅鶴知何在可是今來得再逢
白玉成樓入望高俄聞補籍在仙曹耽奇心欲芟
周禮寄憤身將殉楚騷苦挾詩囊貧愈艷愁捐藥
裹病猶豪那知遂隔泉臺路空向人間購彩毫
童穉相親十載餘比來形跡恨常疎須臾未執衾
前手零落猶存篋內書營墓有人遺麥舫傳經無
子辨銀車幾回慟哭西州路未忍重過處士廬

咏奕

奕有延生理常因曠士傳取材由海島育質自藍

田追琢廉隅見縱橫條理全子聲金楚楚郢道玉
平平左右分雙拒陰陽據兩偏用堪徵動靜體更
合方圓離立魚鱗列斜飛雁翼聯銀欄裝屈曲鐵
網布連綿勝劫爭還後神機得每先娛情琴比德
祛恨酒同權鬪茗春常坐敲燈夜未眠花間秦漢
壘月裏葛懷天瀛海乘螺叟緱山御鶴仙搗霜旋
輟杵驅石漫停鞭置局羅星斗安枰會倥傯玉塵
頻滿斛龍脯忽盈筵智釋思弓幻才論賦筆妍豈
知人換世應使日成年白戰從心解清談藉手詮
當令樵採者老向爛柯邊

盛湖晚眺

十里湖光似鏡澄石塘晚景在西汀落霞連浦瀾
生紫遠水浮村樹失青次第客帆歸片片依微漁
火集星星一聲欸乃人何處更向橋邊倚醉聽

悼五郎

余年三十而第四子生行五小字五郎玉貌豐
皙着目如畫性慧能解事有過于成人者甫三
歲以脾泄殤嗚呼情之所鍾正在我輩山公達
者猶不免濬冲之慟况于余乎今逝且及暮悼
懷彌甚爲作六詩憶之

夙慧生如鄭小同那知孩抱忽成空寂寥經席孤
燈夜憶汝猶能誦國風

落盡林花見乳鶯水邊籬下舊經行鄰童競逐金
丸去憶汝春風竹馬聲

乞米東家日已西柴門風雨正淒淒可憐塵甑常
虛爨憶汝曾無索飯啼

孤跡經年駐旅帷牽衣深抱別離悲寒溪遠棹歸
無計憶汝門前立候時

果熟秋林小苑開婆婆三徑去旋迴袖中每見藏
朱橋憶汝登堂笑語來

賜棗含飴畫閣閒遙聞祖命喜盈顏依依繞膝今
何地憶汝長眠宿草間

重九日風雨偶成

瀟瀟寒雨蔽村庄欲却登高興未忘桐井風侵全
墜綠柳蹊霜染半垂黃廢吟久似潘邠老避稅難
逢費長房獨坐不甘佳節過紀時聊一佩萸囊

述雪二十首

蓋聞蕊闕六花角天公之戲玉鑪三澗興仙
子之謠矧麗名區詎辜良賞今者日掩南荒
歲窮冽易涼飈鬻發上同脈脈之容密霰飄

零遠結漉漉之陣凝陰累月積素踰旬鶴笠
鷺簑各潛皓影瑤林瓊樹並漾清輝寓曠矚
於溪山澄鮮涯岫濯煩襟於几席朗映琴書
若其任地頒形識盈虛之有數憑時釋象悟
興滅之無期旣道契乎吾玄亦神怡夫彼白
用披往牘卽事分題尚覲古人緣情綴韻正
如灞橋驢上忽來鄭縈之吟譙國扇中聊寄
羊孚之讚焉爾

梁苑

梁王遊於兔園置酒命賓相如末至居客之

右俄而微霰零密雪下王乃授簡於司馬大
夫曰抽子秘思逞子妍辭侔色揣稱爲寡人
賦之

鳧渚重陰接雁池璿臺瓊館路逶迤紫壇初獻祈
年瑞朱邸還傳應教詞寶硯色分寒粟細彩毫光
逐凍雲遲飄零苦憶臨邛市正是披裘貫酒時

蔡州

憲宗十三年討淮西未克十月唐鄧帥李愬
率李祐及李忠義等引軍東行諸將請所之
愬曰入蔡州取吳元濟時大風雪旌旗裂諸

將皆失色然畏愬莫敢違夜半雪愈甚行七
十里至州城無一人知者祐與忠義鑿其城
以先登壯士從之殺守門卒而畱擊柝者使
擊柝如故遂開門納衆鷄鳴雪止愬入擒元
濟

元戎夕起陣雲低虎帳傳呼壯士齊紅撥花明搖
組練綠沈槍溼映琉璃寒聲斷續三更柝曙色依
微萬戶雞銀燭畫堂歌舞散那知軍已渡淮西

藍關

小說家記韓昌黎從孫湘善幻術注水盆中

頃刻開碧牡丹二朶上有詩云雲橫秦嶺家
何在雪擁藍關馬不前未幾公以佛骨表貶
潮州途中遇雪湘冒雪來曰憶花上之句乎
公詢其地乃藍關
萬里潮陽嚴譴中蕭蕭匹馬倚悲風忽翻銀海天
無際似到瓊山路已窮雙闕雲烟看漸蔽九門虎
豹叩誰通獨憐直諫臣心苦南太何由啟聖聰

龍門

錢文僖守西都謝希深歐陽永叔同在幕下
一日遊嵩山自潁陽歸龍門暮抵香山雪作

登石樓望都城各有所懷忽于烟靄中有車
馬渡伊水來則文僖遣厨傳歌妓至傳公語
曰山行良佳少畱龍門賞雪無遽歸也

嵩少當年紀勝遊龍門飛霰阻回輶斷橋遠水蒼
烟沒古木危巒素靄浮况有行厨能送酒不妨作
伎更登樓西都畱守風流甚慕下爭傳禮數優

孤山

呂及知杭州戒俗奢靡不事遊晏每訪林逋
于孤山望林麓而屏從者步入其廬一日冒
雪出郊衆謂置酒召客乃獨造逋清談至暮

而返

縹緲麾幢郭外微，遠從山麓叩柴扉。
高低繞屋梅添蕊，來往迎人鶴護衣。
掃徑不須成暖會，談詩應已失嚴威。
西湖一帶山容好，爲愛幽棲未忍歸。

草廬

焦孝然隱居潤州三召不起，結草爲廬。
廬被火孝然露處石上，風雪之夕晏如也。

獨坐空山最上層，松蹊梅隴勢崢嶸。
危灘舟卧垂綸叟，破寺門敲帶笠僧。
眼看世名隨舞絮，心知人事等裁冰。
此間片石差堪共，寧待關西束帛徵。

書牕

孫康素性清介，家貧好學。冬夜不能具膏油，常攜書映雪讀之，達旦不輟。

照耀階除夜氣清，坐披細帙歷殘更。
繩床倚處風催點，紙帳開時月助明。
疑接蓮檠仍黯淡，較分藜閣更晶瑩。
何須復鑿鄰家壁，虛白旋看滿室生。

旗亭

王昌齡高適王之渙，風塵未偶而遊處畧同。
一日天寒微雪，三人共詣旗亭，小飲有梨園伶官十數人會讌。因各避席，俛映擁爐火，以

觀俄有妙伎四輩尋續而至旋則奏樂皆當時名部也昌齡等相約密觀諸伶所謳若詩入歌詞之多者爲優及聞諸伶拊節歌昌齡二絕句適一絕句之渙自以爲得名已久因指諸伎中最佳者曰待此子所唱如非吾詩終身不敢與子爭衡矣須臾次至雙鬟發聲則曰黃河遠上白雲間一片孤城萬仞山羌笛何須怨楊柳春風不度玉門關之渙卽擲掄二子因大諧笑諸伶皆起詣曰不知諸郎君何此歡噱昌齡等話其事諸伶乞俯就筵

席三子從之飲醉竟日

酒旂西風柳外招行逢名部奏仙謠
遶梁雲影紛無定入座花塵冷忽飄
紅頰微酣傾玉斗翠鬟斜
鞞覆金貂佳人自合稱知己
千古詩名訂一朝

漁屋

呂徽之攜楮幣詣富家易穀種值大雪聞東閣中有客作雪詩分韻得滕字苦吟未就徽之笑曰何不舉滕王蛟蝶事耶衆遂迎入請足成之逕出遣人跡其歸路雪晴造訪唯茅屋一間忽米桶中有聲乃其妻也問曰徽之

安在曰方捕魚溪上少頃綴之以魚換酒回
盡歡而散旦日復往物色之已遷居矣

仙居山下老漁家石徑紆迴點白沙簑笠耽吟忘
歲月茅茨爛醉得生涯繁霜繚繞雙蓬髻匹練浮
沈一短槎人去晴溪堪憶處數行衰柳集啼鴉東

邸第

中書舍人路羣清瘦古淡未常言市朝給事
盧弘正魁梧富貴未常言山林性相異而相
善一日都下大雪路在假盧將晏入道過新
昌里第路方于南垣茅亭肆日山雪構火命

觴聞盧至大喜亟命迎入盧金紫華煥意氣
軒昂路道服而坐情趣孤潔路曰家釀稍醇
能一醉否盧曰省有急事俟吾決之路又呼
侍兒曰盧六欲去持早來藥糜我與盧六同
食盧振聲曰不可家饌已食炮炙矣時人聞
之以爲路之高雅盧之俊邁各盡其致

巖壑重重瑤水痕孤亭如笠覆南垣氣寒愈覺林
園淨境僻驚聞車馬喧闕對好山堪入畫喜逢嘉
客卽開尊素心曾不因人熱清晝蕭然獨掩門

寒集

謝太傅寒雪日內集與兒女講論文義俄而
雪驟公欣然曰白雪紛紛何所似兄子長度
曰撒鹽空中差可擬兄女道韞曰未若柳絮
因風起公大笑樂

畫閣芳吟對景拈山屏不耐曉風嚴霏霏屑玉談
中集點點幽蘭曲裏添細似有聲遙入幌輕還無
力下依簾何因吹向金隄樹看取春來舞態纖

晝眠

袁安常客洛陽值大雪盈丈縣令至門命除
雪入見安方僵卧問何以不出安曰大雪不

宜干人

盈門積素正蕭森一榻凌寒擁敝衾境入槐宮真
隔世名埋土室豈營心宿醒未解梨雲重午睡偏
宜蝶夢深堪訝城中冠蓋客雕輪翠幃忽相尋

早朝

謝莊朝回衣爲飄雪點印時人翫之以爲風
韻

紫禁丹霄起素柯天街緩轡影婆娑蓬萊路迴銀
成闕鷓鴣班移玉作坡帶整佩魚飄漸密袖翻盤
鳳拂逾多却疑上苑梨花早片片飛來逐曉珂

晴獵

狄梁公仁傑為相有堂姨盧氏居午橋別墅
 仁傑伏臘修禮甚謹常雪後休假候盧氏適
 見表弟挾弧矢攜雉兔歸羞味于堂上顧揖
 仁傑意甚輕傲仁傑因啟曰某幸為相表弟
 有所欲願悉力從其請姨曰吾止有一子不
 欲令事女主

氤氳霽色滿林臯射獵山頭氣最豪衰草連岡朝
 豕兔溼烟生竈夜炮烹橫抽凍羽弓腰勁遙蹴飛
 花馬足高介酒北堂皮服援羞從人賄御前袍

臆坐

楊龜山時游定夫辭侍伊川程子程子偶臆
 坐時與醉侍立不敢去程子既覺曰二子尚
 在此乎且休矣出門門外雪深三尺

絳幃高擁撒重茵門外驚看色似銀簾隙暗飄經
 席滿簷牙飛點墨池勻旋聞颯杏催行履漸覺嚴
 凝襲佩紳始信伊川能得士相逢不愧歲寒人

割氊

江革少入太學謝眺雅重之常冒雪造訪見
 革擁敝絮而卧乃脫所着襦并割半氊與革

陸野堂集 卷二
充卧具

扶藜不憚路瀾漫
槐市風高木葉殘
四壁虛明孤館卧
一袍零落故人寒
泣衣未似王京兆
穿榻還同管幼安
多少侯門誇炙手
凄其窮巷獨盤桓

烹茶

陶學士穀得党進家姬命掬雪烹茶問曰党
家亦有此風味乎姬曰彼麤人但知銷金帳
內淺斟低唱飲羊羔酒已耳

閒看白戰啟芸堂
遠拂迴闌近覆廊
纖玉乍粘綦跡冷
柔荑初掬指痕香
高擎碧椀依書架
滿貯晶

盤傍繡床只恐清風猶未足
更然文火試旗槍

跨馬

令狐揆卜築涓溪之上常雪中跨馬入城詣
張君房借書令蒼頭攜鶴負琴以隨揆乃長
吟曰借書離近郭冒雪渡寒溪友人林逸繪

圖以贈

清溪素岸幾迴環
藤篋綿裘獨往還
粉堞數層斜映水
茅堂一帶遠依山
人歸烟逕琴囊溼
路入雲林鶴語閒
孤騎晚來吟興發
不知身在畫圖間

放船

笠釣再吟

六

臨野堂集 卷二
王子猷居山陰夜大雪眠覺開室命酌酒四
望皎然因起彷徨咏左思招隱詩忽憶戴安
道時戴在剡即便夜乘小船就之經宿方至
造門不前而返人問其故王曰吾本乘興而
行興盡而返何必見戴

澄棧高館不成眠乘興還開訪逸船斷岸光浮雲
裏樹亂山影入鏡中天酒杯詩卷心俱曠水寺漁
村景倍妍鼓棹自來仍自去幽情都付一溪烟

行酒

宋太祖卽位之初數出微行趙普退朝不敢

脫衣冠一日大雪向夜久之聞叩門聲普亟
出帝立風雪中普惶懼迎拜帝入因設重裯
地坐熾炭行酒會從容問曰夜久寒甚陛下
何以出帝曰吾睡不能着一榻之外皆他人
地也故來見卿遂與普定下江南策

碎碾瑤衢鳳駕來行從天上夜徘徊廣庭忽訝冰
河合曲院旋疑月戶開坐久承貂披寶扇談深飛
羽泛霞杯筵前借箸籌初定宮漏聲遙已暗催

臨野堂詩集卷二終

臨野堂詩集卷三

吳江鈕 琇玉樵著

笠釣三吟

舞綵歌

麻湖湖畔草堂立
 邑號松陵鄉笠澤
 俊傑東浮少伯舟
 神仙西結玄真宅
 十畝斜侵穉稻紅
 千尋高蔭瓊玕碧
 桃花遶岸見漁人
 柿葉垂階來墨客
 柔風色麗海棠晨
 冷露香闌丹桂夕
 看雲有伴鶴棲林
 流水能絃琴挂壁
 堂中高坐兩慈親
 甲子初週蝌蚪曆
 丹顏素髮貌相輝
 綠玉蒼精常在腋
 生兒

行年三十五讀書守道器何窄風塵蹴躡向京華
歸來未捧毛生檄和羹唯采九節蒲肅卮欲進三
重核遙觀宇宙間壽親事充斥而我何爲者乃欲
與之敵朱轂亦有賓鮮腆弄姿勢空赫銅山亦有
徑阿堵聞腥禍已積百鎰亦有金揣摩學業還宜
擇萬鍾亦有粟徘徊道義寧苟獲糟丘亦有酒貪
泉所釀非瓊液騷壇亦有文惡札相諛豈金冊兒
幸未作吏奉命異屠伯兒幸未任俠守身謝人役
兒性幸不慧補簡忘靡斃兒名幸不高鉤黨慎所
適兒幸無厚顏呈箱計知道兒幸無熱衷絕裾行

恐迫漂泊雖同村甫困有弟有妹非遠隔豪侈雖
乏郭令榮有孫有甥差足憚况有親戚共情話淵
明園栗猶堪柄况有田圃恣遊行仲蔚庭蒿已早
闢門外遙傳責逋書口吟丹霞不離席巷內旋來
催稅車足踏蒼虬不躡鳥陶然自向曼都飲悠哉
直對浮丘奕瑤天蕙日晴輝輝碧階芝草芬馥馥
但願年年歲歲傍庭闈常似今朝舞綵衣

題玉仙宮贈筠岩姪孫二首

小結蓬瀛界居然水一方忘言依白石遇客爨黃
梁細草銀壇淨微風玉笛涼不須成大藥日月靜

中長
傍湖塵已隔遠市地逾幽亂水遙浮閣斜陽盡入
樓夢醒憑老鶴來往狎輕鷗何日從湘子同爲汗
漫遊

同公麟兄遊陳園并訪滄溟上人不值

給孤原舊宅今已作禪關一徑盤旋去雙亭次第
間林疎分受月石小各成山偶憇來遊屐探幽未
忍還

宿雨生涼嫩書堂綠滿軒坐看松體直行傍竹陰
繁出水魚常定穿花鳥獨言何如逢慧遠更與論

風旛

松江道中遇雨

一棹寒江值路窮雲陰漠漠上征篷潮痕暗入溪
聲裏山勢遙沉雨色中薄服裝綿忘近夏輕舟依
岸畏多風野田麥爛聞農泣城郭笙歌處處同

月中丹桂歌

九天宮闕何巍峩中有金庭玉柱紛然立其外絙
以瀕洞之明河更築廣寒稱別殿玲瓏七寶珠璣
羅殿前桂樹高萬丈紺膚黛葉敷層柯玄霜杵盡
瓊液溢化爲沆瀣終古相噓呵白鳳舞青女歌仙

人之杖飛入碧落成金波爾時枝頭生丹綴如粟
月中八萬二千戶戶聞有天香過被霓裳兮執
瑤簡導翠節兮鼓雲和飄飄素影攀不得竭來其
下羣摩抄欲問靈根歲月已莫紀但看人間桂子
今如何

農言

農言雨打丁卯日稻爛田中不可食今年春潦已
侵扉復有秋霖蔽溝洫茫茫禾耳沈寒波彌望莫
辨黍與稷靈烏銜照淪何方陰風怒號晝常黑震
電猶行十月後天心悠繆誠難測家人掩泣向西

持錢縛徒嘆息豈知吳會屯軍旅槍壘儲胥
聞孔棘太倉玉粒由民間高舸八輻來如織夜半
飛檄徵窮鄉紛拿到官何偏側疾呼冤酷竟無聞
恣用鞭笞稱盡職自憐力穡未逢年身填溝壑死
亦得

前修塘謠

朝聞官兵至暮下修塘檄官塘不修墮軍機官塘
修時民孔戚泥一斗輒一箕負之擔之向水涯盡
是塘夫膏與脂皇天不識塘夫苦淫雨增波齧塘
土大官督修急如火杵聲薨薨築且堅復索私例

血流鞭泣言大官幸勿喧囊中尚有賣兒錢

後修塘謠

官塘修平如砥馬蹄趑趄行不休官塘蹋入瀕湖
水大官親勘怒何赫口道塘夫用無益派稅民田
須滿額錢歸石工去採石石工徵錢態復驕椎牛
醜酒日逍遙塘邊零落貧家子稅重田荒饑欲死
哀聲不入石工耳

夏夜嘯雪齋偶成

中夏暑偏輕禪房夜更清竹深仍漏月槐暗忽穿
鶯畫燭遙窓影圍碁隔院聲冰綃揮寶扇雪乳沸

銀鑰自是金仙宅何須白玉京悠然舒坐蒲須欲
悟浮生

秋日重過武塘訪柯寓匏翰周兄弟道中卽
事二首時有滇南之警

不堪秋思積再向越溪行風定帆無念雲疎雁有
聲黃欹寒樹獨青遠暮山并一片斜陽路時來引
客情

遐方羣帶甲安枕獨吾鄉猶喜懷人棹仍過聚德
堂蘋洲魚負水蘆岸蟹迎霜二謝林塘在幽叢桂
已香

留宿寓匏致遠樓却憶去年同客都門對月
感賦
酒滿金尊醉不辭年年感客是秋思請看今夜樓
頭月猶是燕臺共對時

清明後二日同吳慎旃年兄暨令弟詩心步
南園口占

南園淑景遙生北郭良朋耦行野外編茅屋小水
邊橫木橋平
鶯聲喚客如碎春色染林已深桃塢笑迎紅靨菜
畦驕擁黃金

佛火晝然古廟佳人午集芳堤羅衫遺馥粘草畫
屐微痕印泥
尋幽地從蔬圃扶醉人來酒罈愁夢忽開柳眼吟
魂欲上花鬚

春日過玉峯謁徐健庵夫子時憺園初成命
酌池上賦臣閔先次耕壽民藝初同集

勝地依丹壑名園仿玉津塢藏雙柳舊門露一峯
新賭墅留碁局書堂侍燭人請看階下草獨占謝
家春

綠野堂初闢青林景自賒石靈堪作友燕喜欲尋

家穿檻池流合依廊竹徑斜只應裴處士來此共
烟霞

道山移宦跡仙館愜歸思富貴看花信經綸展釣
絲月深琴奏靜雲暖鶴飛遲絕構如天上猶疑在
鳳池

夙締珠盤好今從綺席論新歌翻白苧狂語發清
尊水定梅分影風柔燭減痕紛紛蟲鶴夢未許到
花源

補述雪十首

筮重陰者冰至其後賦載塗者霰集其先古

人揆所見端懼而知省良有以乎余以拓落
鰕生羈棲京國一枝所寄僅類林鳥萬里可
行能忘櫪驥于是發歸與之歎興陟彼之思
問道則騎出燕中紀時則星當鶉首凝寒不
懈巧施滕六之工累霽旋開徐示白三之象
傷心南國梅可望于故園攜手北風柳更牽
于別路因緬思夫陳蹟乃諧韻于曩吟聊曰
永言亦云尚論至夫玉龍鬪甲壯天上之軍
容銀海生花表人間之瑞應則術未通乎崇
儼事有職于玄冥非測蠡之敢知操觚之所

及也

山下

曾子耕泰山之下雪凍旬日思其父母援琴
作梁山吟

登嶽長吟倚瘦筇蕭條萬徑絕人踪
棗哇樹禿鋤全覆瓜圃苗稀戶半封
曲磴雲荒看浩浩幽溪泉咽聽淙淙
衣單亦自憐遊子應減高堂舊日容

籬間

孟昶未達時家在京口嘗見王恭乘高輿被
鶴氅裘於時微雪利于籬間窺之歎曰此真

神仙中人

憔悴無人問索居華軒遙度短籬疎
續紛着意迎丹靛撩亂多情集翠裾
廣陌共停遊屐後高樓爭上繡簾初
長安勲業猶堪羨詎獨輕肥嘆不如

簷前

天寶中冬至大雪至午雪霽有晴色
因寒所結簷溜皆爲冰妃子使侍兒敲
下數條看玩帝自視政回朝問曰所玩
者何物妃子笑而答曰妾所翫者冰筋也

簷溜垂冰傍玉階新晴初得報宮娃
鴛鴦瓦合參

差墜翡翠簾明次第排調向錦絃堪作柱插將雲
髻更如釵牆陰瓊屑猶盈尺却覆蒼苔淺印鞋

驢上

孟浩然雪中乘蹇驢覽梅花嘗云詩興在灞
橋雪中驢子背上

茸帽侵寒一騎孤探梅幾見路盤紆山庄映竹分
深淺村舍籠烟共有無數點鳥衝香忽散半林風
落影相扶畫橋流水歸途遠指點吟魂在玉壺

幕外

宋子京修唐書嘗一日大雪添帟幕然椽燭

左右熾炭兩巨鑪諸姬環侍方磨墨濡毫以
澄心堂紙草一傳未成顧諸姬曰汝輩向在
人家頗見主人如此否皆曰無有具間一姬
來自宗子家子京曰汝太尉遇此天氣亦復
如何對曰亦祇擁鑪命歌舞間以雜戲引滿
大醉而已何得似內翰子京點頭曰也自不
惡乃閣筆掩卷起索酒飲之幾達晨明日對
賓客自言其事後每讌集必舉以爲笑

燭奴雙侍近書巢淅瀝時聞帶雨敲帳掩芙蓉香
力細硯開鸚鵡水痕膠倚紅頰喚重圍妓浮白旋

行六甲庖廐憶冰壑當日事幾人堪與說說窮交
客至

陶士行侃家酷貧母湛氏紡織以資給使結
交勝已時大雪積日范逵投侃宿僕馬甚多
侃家如懸罄湛氏謂侃曰汝但出可畱客吾
自爲計因撤所卧薦自剝以飼馬伐柱爲薪
密截髮以供調從者達聞之歎曰非此母不

生此子

車騎臨門夜色分籠沙壓竹尚雲霧簫燈穿壁光
常見攪馬歎芻響易聞髮斷鏡自終黯黯新添土

銓桂紛紜他年深識惡聞意未敢心忘運甕勤

謙具

王元寶每冬月大雪令僕夫自本坊巷口掃
雪爲逕路躬立于坊巷前迎接賓客就本家
具酒炙宴樂之爲暖寒之會時稱豪友

一望林光沒翠嵐朱扉曉闢恣幽探輕花飄樹皆
成六曲徑通門忽有三沉水爇鑪溫坐幄障泥覆
錦駐行驂東鄰不少無衣客那得人人盡盍簪

樵歸

朱百年偕妻孔氏隱南山中以樵採爲業每

東嶽置道旁待需者畱值與之遇大雪樵不
售輒自榜船送孔氏歸母家雪晴然後迎反
時人美之比漢梁鴻孟光焉
凍壑無聲地隔凡高人終日廢長鑱亂雲低壓常
迷路敗葉平鋪欲蔽巖素影誰歌新白苧寒光獨
耐舊青衫饑驅未肯依臯廡每趁樵風一鼓帆
堂成

蘇子瞻謫黃州時郡守馬正卿營地數十畝
是日東坡築室其上以雪中落成名雪堂
澄郊疎樹影幢幢十築初成命酒缸萬頃白沙平

對郭千尋赤壁遠橫江藏書共識仙人柱覓句常
開處士窓較似玉堂名更重風流今古自無雙

夢闌

趙師雄遷羅浮一日天寒薄暮于松林間酒
肆旁舍見美人淡妝素服出迎時已昏黑殘
雪未消月色微明師雄真語言極清麗芳香
襲人因與抵酒家共飲少頃一綠衣童子歌
舞座側師雄醉卧但覺風露冷然久之東方
已白起視大梅樹上翠羽啾啾月落參橫惆
悵而已

寂歷羣峯晚更青天寒翠袖倚巖扃一帘酒肆茫
茫月雙板村扉淡淡星珮解偶然逢漢女曲終何
處覓湘靈繁華入夢多如此不用林間悵獨醒

夢人因與此醉寒共冷更與一絲文童子

書未飲民已醉則酒與詩言醉亦風香

與安舍且美人對冰素洲出與潮子各黑

似酒世豈深管一日天寒萬暮千外林間

夢

臨野堂詩集卷三終

臨野堂詩集卷三終

臨野堂詩集卷四

吳江鈕 琇玉樵著

前筑音

渡江

一點金山入望頻海門潮湧白無垠風波如此真
堪畏不斷江頭買渡人

瓜步酒家

臨流畫閣鎖窓紗晚醉江邊賣酒家客裏不知春
去盡猶攀庭樹問梨花

維揚懷古

錦覆江湍夕照斜
雕甍畫堞彩成霞
玉簫聲斷虹橋月
瓊樹香消紺殿花
杜牧吟來真薄倖
鮑昭賦後更繁華
傷心只有堤邊柳
依舊青青縮客車

淮北遇包自根寄家信

一別燕臺旅夢稀
相逢客舍轉依依
知君鄉思應如我好寄
平安兩字歸

宿遷曉發

三更譙鼓發孤騎
曉寒侵斷夢驚驢
背空囊壯客心
麥風聞簌簌
松露覺沈沈
遙識閔居子
幽眠草閣深

渡河

河流挾春潦
濁浪排天走鼓怒
淮泗間隄防竟何
有
百萬金椎功忽若
决
做符廡廡桑麻原
一旦成菹藪
生靈殫爲魚
十室失其九
苟活有遺黎
攜家集高阜
穴土懸席門
結茅穿甕牖
纍纍砂石間
或提亦或負
豈無淵明兒
橡食不充口
亦有萊蕪妻
鶉衣不覆肘
過客長太息
酸吟動星留
大塊寧不仁
生民亦何咎
厄運當滄桑
流離詎云偶
所須撫字周
責在賢牧守
安得繪茲圖
持之獻宸右
敷惠及窮簷
洪功補高厚

羊流店

歷盡荒原又廢城
綠楊村店曉風清
可憐十日征
人路纔聽黃鸝一兩聲

郟城

平楚烟光密
荒郊暝色添
連畦栽棗樹
通巷接茅簷
沙土風多厲
鷄豚俗近纖
旅途時不靖
征鼓夜常嚴

自泰安州至界首

振策依岱麓
晨發凌餘寒
鬱紆進三舍
所歷皆巒岿
屹蒼然
列羣秀
高曦障遙巒
攀岑疑
迹絕
陟巘知

途寬修阪叢翠篠
懸澗疏清瀾
前車隱石罅
後騎出林端
俯瞰百丈谿
白沙更瀰漫
行人紛若蟻
輪轡交遠灘
對岸倚絕壁
雲構飛層丹
超曠發吾意
幽期愜遐觀
已釋登頓苦
寧起別離歎
愧非烟霞侶
終焉恣遊盤

暮抵紅花浦

參差野戍角聲催
馬首雲橫夕照開
牛斗南看分野盡
青齊東傍大河來
平沙籠日光如雪
衆木迎風響若雷
極望故園天外杳
蒼茫古道使人哀

望嶽

嗟峨絕巘起平荒天外遙瞻曉色蒼名壓華恒來
玉帛勢連河海衛金湯千秋俎豆登尼父萬乘旌
旂駐武皇莫訝相如封禪草東巡輦道久淒涼

泰山石

泰岱鍾靈秀巋然拔萃生雲行根始托壁立勢初
成作貢先浮泗懷珍更入荆仙人書早授天室鼓
旋鳴瀼水看如錦昆池化是鯨補天無剩色擲地
有餘聲鐘鼎功方峻權衡任匪輕崇朝膏雨潤終
日介風清擊拊和韶奏磨礪萃國英狂瀾曾倒海
神衛端成城承柱黃輿鞏支機碧水盈鴻詞碑魏

闕大道砥周京孕璞心何炫栽松骨並貞不辭巖
抵鵠每見谷藏鶯攻及崑岡玉炊爲閭苑羹光明
分皜皜纖細失硜硜西蜀供文貴南宮拜笏榮台
階欣得地隆棟望齊名片語寒山共高歌甯戚賡
缶雷慙瓦響磬羽羨鴻征五色星精麗千秋鐵誓
明仰瞻如萬仞奕禩荷昇平

蒙陰道中

斷靄分羣岫殘霞映遠林花迎愁客面鳥作異鄉
音水渡沙流急山岡軌道深孤城雲外見前指是
蒙陰

堠亭山曲抱石壁路斜通馬足圯橋下人烟列嶂
中放蠶椒葉綠釀酒稷林紅此地稱淳樸猶堪備
采風

張夏卽事

地瘠廛居少山空夏木清荷囊人倚杖汲井婦垂
罌牆累如丸石門編未剪荆金仙何獨侈梵宇盡
丹楹

流智廟

齊地行初盡祇林望不賒映莎皆碧憶塞路總香
車鬼貌丹青麗神宮土承著誰爲驅旱魃飛雨徧

桑麻

白溝河次壁間韻

市橋新柳碧粼粼漁火蘋烟點暮潭坐看河邊茅
店月清宵流影到江南

蘆溝橋

萬里來遊多宦跡九衢相逐盡征輪荒荒白日蕭
蕭馬祇見紅塵不見人

立秋

疎雨生涼一葉飛猶將蓬跡滯皇畿故園日望人
歸去那得秋來更寄衣

七夕漫成

鳳城新霽月如鈞令節偏能動旅愁
蟋蟀西堂羈客夢蒹葭南國故園秋
思歸無那悲王粲寄食真堪愧
馬周莫道長安天上近銀河碧水信悠悠

賦得秋雁送友南還

燕關高翮久相依忽報隨陽舊侶稀
上苑一枝曾莫寄故山千里自能歸
秋雲寫影遙成字夕照含輝獨振衣
我亦他鄉畱滯客凌風深羨爾南飛

中秋對月同柯寓匏賦

去年此夕秦淮上素月清波兩相向
灑灑寒輝映

玉樓濛濛香霧迷
與還同清夜遊
且將尊酒慰離憂
狂吟自擬題桃葉
爛醉曾到石頭今
年忽作燕臺客
復見中秋懸桂魄
天街雨過九霄青
陸海雲凝千戶白
龍樓鳳閣影嵯峨
仙樂時聞渡御河
笙歌瑤席金張讌
釵鈿香車秦虢過
自嫌踪跡仍羈旅
荏苒流光不堪數
慷慨心隨博望槎
淒涼身寄臯通廡
高館銀燈畫影殘
秋風孤劍不成彈
最憐一片團圞月
歲歲常從客裏看

遊西苑

帝德高無兩皇居壯亦同
崇墉仙緯逼馳道彩雲

融暑靜天街雨秋生禁籞風曲波明澈灑遠樹鬱
龍葱玉螭雙橋合金鰲六水通戢鱗魚在藻翔羽
鳳棲桐弱柳搖絲碧嬌荷墜粉紅五亭皆拱極孤
塔迴浮空艷跡妝臺古香林梵宇雄鸞坡雲作砌
龍艦錦爲幪行樂思文囿從遊憶謝公觀瞻怡拙
日泮渙愜微躬未侍瀛洲筆還乘上苑驄回看天
闕近只在五雲中

貴交行

玉河之水東西流綠槐夾道蔭通溝朱甍碧瓦相
鱗次雕輪繡轂如雲浮昔昔公卿起徒步衣繡誰

知舊衣布聽鶯上苑杏花春走馬章臺芳草暮杏
花如綺草如烟珠履錯落盈堂前冠軍列坐璣瑜
席處士爭題鸚鵡篇冠軍處士常歡燕金張姻戚
羅畿甸俠氣偏能重灌夫玄言直欲傾何晏滿眼
交遊幾度新歲歲風烟秋復春黃金已盡頭欲白
零落京華無故人自憐薄宦天涯老憔悴金門色
如槁却憶蓴鱸在故鄉秋風乍引歸思早靈曜西
馳豈更回投箸長嘯賦歸來梁外三刀空舊夢門
前五柳是新栽

送友歸茸城

共是他鄉客還添送遠愁旅懷同舊雨歸路及新
秋曉月明官渡寒笳隱戍樓帝城回首處萍跡幾
人畱

寄玉舟弟

墨莊深處彩雲開仙侶籠鷺日幾回坐想秋風門
外路乞書應少一人來

梅花吟送柯公子寓匏還武塘

燕山寒早風凜冽十月疎林點飛雪恰似江南萬
樹梅故園芳萼俱爭茁芳萼纍纍滿故園不待春
來花已繁自從畱滯示年久牢落風塵幾回首武

塘公子才絕奇口吐白鳳多姪詞高鼎相逢官閣
內冰心共証歲寒時一朝揮手還鄉去孤客天涯
尚流寓可憐同住不同歸歸向梅花最深處君到
江邊醉夕曛遠籬映水白紛紜瑤臺不進愁中笛
翠館常飛夢裏雲一枝忽發窓前地彷彿還疑故
人至此時若與寄相思莫負春風隴頭使

對酒歌送王二尹之任餘干

位不必萬戶侯身不必千金裘拓落一官亦自適
北門徒爾生繁憂古來賢達多如此碌碌浮名竟
誰是關前望氣豈無人柳下聞風曾作士君家舊

巷本烏衣抱璞不言知者稀風塵十載宦猶薄菽
粟五斗官仍微長安少年盛遊冶鳴騶食肉何爲
者獨有當時獻賦客猶自低眉屈人下君不見龐
士元鳳棲枳棘難高騫又不見陶泉明室懸簞瓢
心寡營且復攜琴還結綬百里卧治亦何有陶然
相與遊華胥請君且盡杯中酒

徐大司成立齋夫子四十初度用徐文長韻

奉祝

傍闕烟籠玉署蒼繞籬花染菊尊黃此時競識華
簪慶當日爭傳繡褱香珠益一九星吐瑞麟書兩

角紱呈祥天爲降德如山甫亦稱師是子房隱
霧乍開驚豹變潛淵初躍快龍驤奇搜枕寶三聰
出富擁城書一面當文體露藻真綽約才華風柳
早飛揚飄飄彩筆遙陵漢汨汨新詞近鑄唐斟酌
情田思有畔縱橫藝海學無疆干將氣軼青霄上
奎壁輝騰紫極旁行入瓊林看舞燕坐乘玉軼向
扶桑洪紛五色層雲麗掩映三台列宿光海內文
章推典則朝端姓字震遐荒連鑣譽並雙騏驥振
羽鳴先兩鳳凰縱壑遇同褒頌美和羹味勝說謨
良直廬久佩雕金管校士還持琢玉斲二陝風流

歸絳帳三秦文雨蔭甘棠門前桃李堪成徑世外
參苓盡入囊禮樂諸生宗博雅山川羣彥仰堂皇
著書錦幄諳經術讀史藜燈熟典章賦奏內官供
筆札碑迎太學載車箱桓榮執醕年猶壯疏受登
筵體更方四姓子孫容肅穆六經同異說汪洋將
成國器劔新發欲倒文瀾障久狂冠帶園橋盈米
廩管絃比屋奏匡床數千外舍承陶範上九尊爻
傍袞裳箴奉丹函惟敬怠議崇白虎只彝常瀛洲
虞褚皆迴席泗水顏曾悉裹糧強仕作人真壽愷
成均起化足平康鳳城秋滿芳莢發蓬閣雲流錦

幕張金粟小山開瑞域瓊華大藥貯靈藏交游黃
石俱傾蓋第宅青谿各浣觴爭美冲齡躋少傅復
欣華祝繼重陽占梅欲放南枝蕊挹露旋傾北斗
漿聲叶堦篔花萼會駕驂鸞鶴綵芝塲仙京地得
居偏近弱線紋添日漸長樗質五湖原散客柴門
十畝在寒塘卜鄰幸托鳴珂里慳遇空憐載石航
學斥編摩羞季子家傳書籍授中郎吹竽市上心
多負運甓庭前力尚強頑璞那能明卞氏神風未
解序滕王忽承補籍鴻都檄遙寄通經博士廊宣
鼓苔荒從探索孔壇松老看飛翔不成偉節名垂

臨野堂集 卷四
洛徒擬相如跡寓梁入道每思求罔象釋疑終望
辨岐羊齋分安定才方別業受昌黎惠莫量舍瑟
門牆常獨後操觚詞賦敢隨行崇高已慶三槐近
單厚仍祈百穀償喜值矢弧懸闕閱恭陳頌禱賦
桑楊微吟自愧非仙奏佇聽瑤笙並鼓箏

冬至

短景嚴寒客異鄉還因葭管候初陽天涯不道愁
如許與日爭添一線長

除夕


寒深簾外雪飛凌此夕淒然感自魂萬里高堂雙

白髮三更虛館一青燈思歸淚與年俱盡望遠心
如夢莫憑聞道龍驤兵塞路春風客舸早宜乘

送鹽官朱人遠南歸

雪盡河橋雁北飛青門草色上征衣君行爲報江
南柳春欲歸時我亦歸

臨野堂詩集卷四終



臨野堂詩集卷五

吳江鉅 琇玉樵著

後筑音

山左道中

參差石筍穿雲出一片平蕪境忽開滿眼山容看
不盡馬頭又是數峯來

七月二十九夜夢中作

來往邯鄲道浮名誤至今十書雙白壁一賦千黃
金纍纍睹陳迹蕭蕭生遠心涼風滿虛牖夢遶秋
燈深

初秋宿王公子齋賦贈并示周逸少

微雨浥秋塵天街淨如拭徑轉韋杜西高齋慰所
適中有烏衣賢所欣在往籍班荆稱素心疑義得
共析吾行偶來茲相與披疇昔適符古人言坐對
成三客塵尾清風生喜無文貌飾撫劍論殊超剪
燈談轉劇肴醴出行厨流連遂及夕露深蟲語繁
月正樓陰直憑欄何其危俯視乃歷歷圓波鳧鴨
亂曲岸菰蒲積鄰園綺閣開彷彿見丹碧萬象來
空濛靜觀亦多益呼僮更展書讀罷東窓白

送宋民部牧仲視稅贛關

金精萬仞攢空碧十八灘流如箭疾章貢雙江擁
鬱孤雄關獨倚巖城出白榜青簾奉使舟廣平仙
客最風流西清姓字疏高等南戒山川鎮上游此
地由來控甌楚公才經緯宏文武彩筆猶當掃銳
師牙籤寧獨籌泉府况是從容坐嘯餘筭緡早已
壯儲胥和鈞慎用周官法平準徐緡太史書萬里
帆檣來賈舶嶺路新春吐晴萼好從暇日賦梅花
疎簾畫捲清江閣

賦得冰鑑呈宋少宰蓼天先生

天地容初肅羣陰入化工烈藏宣子日涼發楚王

風廉讓雙泉合甘柔八水融瑩沙紋作篆含藻彩
成叢乍覺霜稜峻徐看澤腹空氣真消鬱燠光足
淨明聰素質曾無染精心詎假攻規模忘刻畫色
澤待磨礪的皪離秦殿團團出漢宮遠來珠浦上
高置王堂中常得依彤陛無煩覆錦幪水晶簾不
隔雲母帳仍通織芥誠難浼輕塵未易蒙妍媸形
卽判污潔理能窮賦筆芳梅並歌辭皎雪同貴應
踰白璧滿豈類青銅柱立寒相倚壺凝淡自充銀
臺供照曜瓊樹競玲瓏十丈盤猶永千秋錄更崇
清輝誰得似明月在林東

送湯素公從軍閩中二首

捷獵飛旌逐塞鴻兩行匹馬公從戎世交不用黃
金合心事應唯白雪同磨盾檄成千嶂月運籌談
起四筵風家聲况是蘭臺舊秘策終收定遠功
吳鈞雙帶錦裘新佐府才名動八閩路人故園仍
作客身緣薄宦尚依人紅亭蒜嶺攜尊夕翠幄榕
城奏角晨絕勝儒生披短褐悠悠書篋老風塵

秋庭八詠 有序

徐立齋夫子之寓長安邸第也鳳闕崇霄左通
宣武雞園淨域右邇慈仁登堂之聲伎之繁供

案鮮丹髹之飾而副書輯雅業富縹緗修夕養
晨心閑渠矍兼乃暢悃庭卉結韻籬芳每於周
旋禁近之餘提挈清華之暇斟泉蘇鬱峙剪闢
蕪皆雅自持攜親爲灌沃是以陽條駐采競進
榮觀幽蕊延華互呈妍悅落英未掃旣繡地而
爲茵繁蔭如圍亦補天而成幄豈止歐陽座上
僅傳荷月之觴弘景齋前獨發松風之夢已哉
若夫賓回新雁序薦輕颺春艷都刪秋翹自振
金商已御垂慈禱於修簷玉露方零溢芬菲於
曲檻迎寒彌秀實恃孤標秉肅逾滋更徵勁節
蓋殖民者惟本莫撥則向日交欣養士者非類
必鋤則干霄易達有懷郭術無假漢機故知樹
德之攸通亦越耕情之所寓也琇過謁高門侍
從曲席文燈密邇酒石流連雨溼紅殷錦濤浮
硯風靡綠駭翠黛侵裾幸遇入林寧忘濡翰碧
絲栽柳親承晏同叔之高風鐵筆賦梅竊附宋
廣平之末響焉爾

竹

好與松梅並作圖蕭森孤榦不須扶生平直節能
如此何可庭前一日無

梧
根托龍門路本賒亭亭移傍曲欄斜錦毛小鳳時
來集不待春風試早花

葵

百菜稱王味獨尊莫令宮戟易傷根向陽共有丹
心在——還教植後園

菊

妍卉誰非競艷陽獨依籬叫傲微霜扑看盡日容
逾淡晚節方知得久香

鷄冠

會說西窓報曉更顫紅舞碧悄無聲
文采耐得風霜未得鳴
鷄冠亦自成

海棠

仙種分來閬苑遲却從秋冷見芳姿
如錦對此仍多閣筆時
灑西才子文

玉簪

紺碧羅輕葉費裁數叢低遶數枝開直如銀管非
無用悟主曾從永巷來

素馨

月靜風微酒半醒夜涼香細逗雲屏冰心一片堪

同証不負嘉名是素馨

贈玉峰三孝廉 集韓

余不喜作賀人詩而玉峰三君皆素心友也
已秋偕雋北闈適余旅病初起因讀昌黎集遂
輯句爲三體以贈昔昌黎人文雄冠當代而彌
自撫抑每邁名流則極意甄賞時見推拔觀贈
人薦士諸篇邈然識其淵抱是藉彼曩吟恢揚
盛遇固無待更攄已思矣

王醇叔

詔下諸郡國試官得鴻生竊天貢睽異工席歌鹿

鳴綴佩雜蘭麝連輝照瓊瑩君才何侷儻赫赫流
盛名

躑躑媚學子竦竦高雲擢科名揜衆俊聲譽耀前
閥吐芳類鳴嚶考古垂矩矱願得長輝映希君爲
追琢

徐藝初

始我來京師心跡兩屈奇滉蕩天門高無由至彤
墀往歲獻詞賦文字少歲蕤指摘困瑕玷與世實
參差於今已三年覲然不知歸穆穆鸞鳳友悠悠
我之思清文玉絕瑕雕鐫妙工倅平生千萬篇初

不用意爲未來聲已赫夜夢多見之一來取高第
若摘領底髭風雲入壯懷鐘鼓樂清時屬我感窮
景終朝苦寒饑古心雖自鞭俗流知者誰規模背
時利無乃失所宜才命不同謀離離挂空悲安得
生兩翅高風送追隨

陸舒成

秋風初吹季月管正值萬株紅葉滿四門肅穆賢
俊登刻畫圭角出崖窾王都觀闕雙巍巍苟有令
德隱不腓同時流輩皆上道誇雄鬪麗止者誰揮
霍紛紜爭變化波濤入筆驅文辭知音自古稱難

遇子時崙塲誇紫距噉噉鳴雁鳴且飛青蠅側足
蚤蝨避二十辭家來射策高揖羣公謝名譽當今
賢俊皆周行我材與世不相當自從流落憂感集
推書撲筆歌慨慷平明出門暮歸舍往來滿屋賢
豪者論詩說賦相誦誦鸞翔鳳翥衆僊下我願身
爲雲助汝五龍從九鯤乘風振奮出六合天關悠
悠不可援仙梯難攀俗緣重自嘆虞翻骨相屯

寄暢園賞荷陪諸先輩

名園龍甸北勝地鳳城東曲徑風林合微波石沼
通紅飄香染袂碧瀉酒盈筓嘉會誰堪並蘭亭往

事同

晚酌當芳渚名花映綺筵楚蘭心並潔謝草筆爭
妍葢倚臨風後珠傾得露先叨陪池上客作賦愧
樊川

己未除夕

看劍燒燈影獨親不堪旅跡尚京塵還家此夜難
爲夢作客頻年畏及春途幸未窮真仗友詩無可
祭枉稱神故園遙憶團圞會添得高堂白髮新

冬夜感懷示高阮懷用施愚山內翰韻

三別湖干舊草堂不堪搔首問蒼蒼貧交愁對如

前歲旅夢慙歸是故鄉縱酒有人偏狗醜埋憂無
地轉成狂最憐一片長安月夜夜依人白似霜

遊西山勝果寺

勞生寄塵鞅久負東林約及此淑景遲願言尋夙
諾孤騎入春風羣芳麗叢薄畦綠生麥稊村紅破
桃萼徑轉身益高迢迢達岑萼花下一扉開披襟
坐危閣落照橫亂峯輕烟散絕壑回看向所歷了
了見墟落於茲得靜觀忽若成大覺時有疎鐘來
遠聲度寥廓

廣泉寺

孤泉山半見流紅石磴峻嶒一線通曲院穿雲纔
得徑短垣圍樹各成叢峰頭犬吠中宵月澗底松
鳴下界風卓錫有人今已沒始于香地識真空

贈尹侍讀子登

年少承明久直廬瀛洲仙佩見金魚籠鞭遠扈龍
城獵橐筆親讐虎觀書好俠千金常贈劍探竒一
字每停車鳳凰池上誰同侶皎樹臨風玉不如
故人千里來爲客三載相依愜素心憐我頭顱添
白髮感君意氣賤黃金看花南陌春新舊剪燭西
窓夜淺深攜到一琴猶未碎孤懷端恐負知音

長至後同蓀友錫鬯其年電發舟次次耕翰
林諸公集慕公子禹齋分韻得黃字心字

高軒來勝友薄暮綺筵張杏酪凝匙白桑醅注盃
黃痕移銀燭短響報玉壺長不飲惟何遜陶然入
醉鄉

六載京華客沈淪直至今恭存公子禮狂合故人
心座密春來近窓虛月到深莫教行樂緩歲序已
侵尋

奉懷趙僉憲爾合先生四首

清卿舊是玉堂仙居近長安杜曲天諫草篋中存

百八客材門下得三千春醪量欲令人醉冬日心
常向闕懸柏府蓬山懷往事儀型端不愧前賢
海內誰聞好士名偏於吐握見深情曾從患難全
張祿却爲猖狂重馬卿北海尊開同點筆東山碁
罷對論兵最難十載飄零客時得階前倒屣迎
勞臣自昔賞難酬詔許還家不暫留舊侶仍攜雙
白鶴新裝獨駕一青牛伏波苴蕙誰明謗司馬琵琶
併作愁遙憶鄉園清夢裏幾回端笏殿西頭
門柳庭槐一水涯村庄色帶古烟霞樓臺不起平
泉地書卷常盈下澤車得失心閒看塞馬言疑情

幻付杯蛇何時重慰蒼生望未許東陵學種瓜

重遊海棠院有懷

海棠小院壁人家紅倚東風一樹斜最是春魂銷
不得秋來仍作斷腸花

謝母

皇穹流灑氣鍾異爲人傑亦越閨閣姿時時著奇
節卓哉謝氏母夙性賦冰蘂值此喪亂秋室家俱
喋血盟饋始及笄鷄飛遂早折藐焉有遺孤慘復
見標奪登堂視老姑日夕但悽咽俯念奉養身未
敢遽引決黽勉驚珥璫縱橫費詞說始得還掌珠

承祧竟無絕兼授畫荻書躋之偉人列立孤良獨
難茲語聞往哲詎期中幘中大義明若揭崎嶇三
十年始終志不涅愧彼鬚眉徒臨難負六尺貞筠
干蒼霄勁柏凌皎雪宐爾永壽考旌揚達魏闕舉
世尊禮宗彤管紀芳烈

臨野堂詩集卷五終

